

DISPUTATIO MEDICA
INAUGURALIS,
DE

PARALYSI.

QUAM,

FAVENTE DEO TER OPT. MAX.

Ex auctoritate Magnifici Rectoris,

D. JACOBI TRIGLANDII, I.F.I.N.

S.S. THEOL. DOCT. ET IN ACAD. LUGD.

BAT. PROFESSORIS. ECCLESIAE

IBIDEM PASTORIS:

NEC NON

Amplissimi Senatûs Academici Consensu, & Celeberrimæ Facultatis Medicæ Decreto,

PRO GRADU DOCTORATUS,

Summisque in MEDICINA Honoribus, & Privilegiis
ritè ac legitimè consequendis,

Publico Eruditorum Examini submittit

NICOLAUS VAN RYP, LUGD.-BAT.

A. D. 22. Junii, loco, horisque solitis.



LUGDUNI BATAVORUM,

Apud ABRAHAMUM ELZEVIER.

Academiae Typographum. M DC XCIX.

Nobilissimis Prudentissimisque

V I R I S,

REIPUBL. LEIDENSIS
PRÆTORI,
CONSULIBUS,
SCABINIS.

D. DANIELI VAN ALPHEN, S. F. J. C.

D. JOANNI VAN BANCHEM, PRÆSIDI.

D. JOANNI ELEMAN, J. C.

D. GERARDO MEERMAN, J. C.

D. YSBRANDO DE BYE, J. C.

D. PETRO VAN DORP, PRÆSIDI.

D. LUCÆ VERHOOFD, M. D.

D. JOANNI VAN CINGELSHOEK, J. C.

D. JOANNI VAN ASSENDELFT, J. C.

D. JOANNI VANDEN BERG, J. C.



D. PETRO VAN LEIDEN VAN LEEUWEN.

D. NICOLAO VAN BANCHEM, J.C.

D. ADRIANO VAN CRUISKERKEN, J.C.

N E C N O N

Consultissimis Spectatissimisque

V I R I S,

D. JUSTO VAN HEEMSKERK, J. C.

Avunculo suo per affinitatem Honorando.

D. JOANNI VAN GROENENDYCK, J.C.

Illi Nobiliss. Coss. à Consiliis, Huic Iisdem
à Secretis.


Se & hanc Medicam Disputationem
simplicissima observantia

D. D. C.

NICOLAUS VAN RYP.

Auctor.

VIRI GRAVISSIMI,

uod Terentiano Adolescenti evenisse dicitur, ut, postquam ad Iudices ventum esset, non potuerit cogitata proloqui, idem & mihi, hic Vos salutaturo, evenisset, si ad Gravitatem duntaxat Vestram & Splendorem, quo fulgentes meritisimo optimoque publico eminetis, animum meum convertissem. Sed timidum conscientia tenuitatis meae, & claro obstupefcentem lumine erexit singularis ille Amor, quo bonos, patrio Vestro gaudentes, & placide fruente Imperio Consilioque, soletis complecti & adjuvare; firmavit eximia illa Comitatus, qua Privatorum ad Vos aditus ita faciles sunt, ita liberae querimoniarum petitionesque, ut, qui Dignitate omnibus excellitis, Facilitate pares infimis esse videamini. Ausus ergo sum Adolescens hoc in loco, Viri Praestantissimi, Vos compellere, & quanta maxima possum veneratione, obferre Vobis & consecrare Inauguralem meam Disputationem; simul ut devotissimam Vobis mentem meam aperirem, simul ut probarem gratum me & sane quam memorem & aliorum complurium beneficiorum, & illorum insignium, quibus, ad nos etiam redundantibus, cumulare voluistis Patrem meum, nunc ipsos Viginti annos, secunda Voluntate Vestra, in Celebris vestro Gymnasio poliende Juventuti adtendentem. Si, quod facio, propitiis Vobis fecero atque adnuentibus, in caelo ero. Valete, Ornatissimi Viri, Pietate & Prudentia letitiam temporum in rem communem & privatam revocare pergite.

DISPU.



DISPUTATIO MEDICA
IN AUGURALIS,
DE
PARALYSI.

§. I.

Santa Corporis est, quod sani valentesque homines in terris circumferunt, venustas ac pulcritudo, ut comparatæ illi bestię vel laudatissimæ declarent, quid præstet cæteris, quid intersit. Caput erectum, factumque ad cælum, innumeris distinctum sideribus, contemplandum; forma Oris, modestia Vultus grata; insigne Colli decus; candor Pectoris; Ventris species; Artuum, quos nominant.

nant Medici copulatas Corpori melioris vitæ causa Partes, modus adeo concinnus, ut nihil supra, Poëtas permoverunt, ut canerent, Humanum Corpus in Deorum cuncta moderantium effigiem esse fictum. Quid vero, si conspicuus, natusque in usum ac fructum varium motus summo factorum artificio Membrorum magis minusve cesset interceptus? Deteriori omnia in loco sunt, ni iis subveniat Ars salutaris, quam ex ære aut marmore statua. Hæc enim perdurat motus expers: illa flaccescunt indies, & peste tandem propagata, intereunt. Scio haud unius morbi symptoma esse Motum deficientem manifestum. præcipuo varioque modo læditur in *Paralyfi*: hanc igitur, antiquæ satisfactorum consuetudini Academicæ, excutere adnitar.

§. II.

Elegantes Græci, qui indigestam ac rudem Medicinam sapienter feliciterque excoluerunt, ea cum rebus aliis, tum etiam humanis infirmitatibus dederunt nomina, quæ intelligenti quandam illarum ingenii speciem suggerunt. Ita hanc, de qua ago, vocant *ῥαλυσιν*, *πίρεσιν*, ut cætera omittam, quod Partes, motui servientes animali, resolutæ, remissæ, laxæ sint, & *μόρια ῥαλελυμένα*, flaccida & motus expertia dependeant. *ῥαλυσιν* enim Resolutio est, à *ῥαλύομαι*; *πίρεσις* remissio, laxatio, à *παρίεμαι*, remissus languidusque reddor. *παραιμένοι*, *ῥαλελυμένοι*, *ῥαλυντικοὶ* dicuntur Ægri, ad se movendum magis minusve inepti. *ἐπὶ κλίνης βεβλημένους* videas in Sacro Codice; *κατακειμένους ὑπὲρ κρεβάτων*. quos verbo erigere, dimittere firmatos domum, *Θεανθρώπων* Salvatoris nostri erat, & Virorum, hac per ipsum facultate insignium: quorum facta stupens

pens populus vere dicebat : εἰδομὲν παρὰ δόξα σήμε-
ρον.

§. III.

Etymologiæ , quam in cæteris Definitionem etiam Nominis Logici appellant , Rei subjungo Definitionem. quanto autem Res Nomine potior , tanto quoque hæc illa difficilior est. Haud ignoro describi solere *Paralysin*, Motus animalis, aliquando etiam Sensus defectum , unde flaccidæ evadunt Partes movendæ: cum vero ita , Symptomate descripto, ostendatur magis quod Morbus adsit , quam , quid sit , indicetur ; malui ego , aliorum , quos colo & observo , neutiquam improbens rationem, Thema meum definire, quod sit *Obstructio vel Compressio spinalis Medullæ totius; dimidiæ; Nervorum inde propagatorum: Fibrillarum Medullæ, Propaginum, Musculorumve Intemperies* : quibus si addidero *solutam*, quæ accidit quandoque, *dictarum partium Unitatem*, triplex notavero Genus Morbi , Διαίρεσις παρὰ φύσιν, ὑφ' ἧς βλάβεται ἐνέργεια , motus , hoc puta in loco, Voluntarius s. animalis, quem in Medicina Græce quomodo appelles non interest , καθ' ὅρμην, ἢ κατὰ παθαιρέσιν, inquit *Hofm. Instit. Medic. L. 2. c. 15. §. 6.* apud Philosophos hæc differunt.

§. IV.

Cum *Medullæ Spinalis* meminerim, quæ haud absurde dicta est quibusdam *Cerebri* διὰ ῥόον; stiracis enim instar, quo propius ad os sacrum descendit , eo fit gracilior ; si discesseris à duobus locis amplioribus , unde Nervi abeunt in brachia & crura ; cum *Nervorum* ex illa prodeuntium, *Musculorum* etiam, quibus inseruntur ; sufficeret , opinor , proposita Nobilissimi Visceris eique adnexorum delineatio , qua lumen
Para-

Paralyseos rationi præferretur. Sed Theoreticæ Exercitationes Practicæque , quibus adtendi , ubi Motus integer vel læsus explicatur , suas quoque adsignant partes tenuissimis Corpusculis, quos *Spiritus Animalis* vocant : brevem igitur Functionum, in quibus rudimenta illorum atque incunabula videre est, commemorationem præmittere sustineo.

§. V.

Parens Spirituum Sanguis est , Sanguinis Chylus, Chyli Cibus : qui cum variis constet Particulis, liquet vere dixisse *Hippocratem in libello περὶ διαίτης ἰητρικῆς ferme medio*. Ἐνὶ γὰρ ἀνθρώπῳ καὶ πικρὸν, καὶ ἀλμυρὸν, καὶ γλυκὺ, καὶ ὀξύ, καὶ στυφνὸν, καὶ παλαδαρὸν, καὶ ἄλλα μυρία, παντοίας δυνάμειας ἔχοντα, πλεῆθος τε καὶ ἰσχυρὰ ταῦτα μὲν μεμιγμένα καὶ κεκρημένα ἀλλήλοισιν ἔτε φανερά ἐστιν, ἔτε λυπέει τὸν ἄνθρωπον. In Homine namque inest (*Fæsi* est Versio) & amarum, & falsum, & dulce, & acidum, & acerbum, & insipidum, & alia sexcenta, quæ, pro copia & viribus, varias habent facultates. Hæc quidem mixtione & mutua inter se contemperatione neque cernuntur, neque quemquam molestia adficiunt.

§. VI.

Varius ille Cibus in ore comminutus, &, dum subigitur saliva, leviuscule maceratus depulsusque in Ventriculum, ab efficaci menstruo, calore, qui adest, blando adjuvante, dissolvitur, attenuatur, & fermentatione lenta disruptis partium lateribus, tenuioribusque ex poris & fibris crassarum eductis, *χυλῶπις*, in succum redigitur, Medicis peculiariter *χυλὸν* dictum, qui, iteratis vicibus, motu interno externoque exiens potissimum per *πυλωρὸν* in Duodenum descendit, ubi dilutus lymphæ Pancreaticæ, & Bile
magis

magis divisus aptior fit, opitulante præsertim Calore & Motu Intestinorum peristaltico ad subeundem per Velamentum bombycinum Vasculorum lacteorum orificia, pergendum per hosce ductus, Glandulas Mesenterii perreptantes, ad commune receptaculum. Dubitetne quis, an plurimum mutetur Chylus, hac in via ubique sese accommodans tubulorum pororumque angustorum Mœandris, tum lymphæ, infinitis à partibus adfluenti, in Vesicula, è Glandulosa congerie facta, commistus? Nunc adsurgit per Canalem, ab illa ortum Vesicula, nominatum vere, ubi Diaphragma superavit, Ductum Thoracicum, ad sinistram plerumque subclaviam, & sanguini, à partibus superioribus refluxo, confusus in dextrum Cordis Ventriculum defertur.

§. VII.

Si quis suo reputet in animo notatu dignissimam particularum diversitatem, quæ cum hoc in descendente, tum in adscendente inest sanguine; si quis percipiat, à ratione haud alienum esse, fermenti quid suppeditari ex Glandulis, vasculisque earum Lymphaticis, ex poris arteriarum Coronariarum, impetuosum sanguinem vehentium, ex Nervis Cordi insertis, ex sanguinis modo expulsi reliquiis (quæ enim densa Cordis latera adeo arcte queant comprimi, ut nihil inter Fibras & Columnas, nihil in Ventriculorum eorumque interstitii Cavernulis hæreat?) facilis admittet insigniter agitari calido in Foco laticem, particulas ejus isthac agitatione valde quam distrahi, incidi, dividi; magis etiam, postquam latex hinc expulsus, & in trajiciendo Pulmone multum à recepto aëre mutatus, iterum, & quidem vehementius efferebuit in Ventriculo sinistro. Hic contractus ejicit san-

B

gui-

guinem in Aortæ Truncum, ex quo, in subclavios
diviso Ramos, ortæ Carotides, & Cervicales Arte-
riæ plurimo turgentem spiritu ad Caput vehunt &
Cerebrum.

§. VIII.

Cerebri omnes & singulas si hic enarrarem partes,
positos mei operis fines transilirem. Satis erit dixisse,
quod visceris eximii corpus duplicem habeat materiam,
colore etiam diverso spectabilem, cinereo &
candicante: illo imbuta pars exterior *Cortex* dici
solet, hoc autem interior *Medulla*. Sic differunt
specie & loco, re multo magis. Dicit *Hippocrates*
libro de Glandulis c. VII. τὸν ἐγκέφαλον ἵκελον ἀδένι,
Cerebrum Glandulæ similem esse. Conflatum verè
è Glandulis *Corticem* detexerunt Præcellentes men-
te & manu Anatomici: in quibus jure optimo habi-
tus *Godefr. Bidloo V. Cl. Anatomes & Collegii Prac-*
tici in Athenæo Batavo Professor Ordinarius, Col-
legii ibidem Chirurgici Præses, Præceptor meus æ-
tatem mihi colendus, in explicatione decimæ Magni-
fici Operis sui Tabulæ inquit: Cortex hic, qui om-
nes Cerebri Partes ambit, innumerabilium Glandu-
larum subcineritiarum est acervus. Hæ omnes licet
tortuose videantur dispositæ, tamen racemorum ad-
instar acervatim colliguntur, ordinesque rectos duos
& interdum tres efformant. Figura, nec magnitu-
dine unaquæque cum adjuncta sibi vicina convenit.
Ratio additur rationi conveniens, Glandularumque,
adhibito auctarum Microscopio, facies pulcra expri-
mitur. Eorundem porro Artificum Solertia nos do-
cet, sedens sub Corticali hoc tegmine corpus albi-
cans, vel *Medullam*, coagmentationem contextum-
que esse infinitarum & valde quam subtilium Fibril-
larum

rarum five Tubulorum, qui à Glandulis illis prodeuntes, multos veluti in Fasciculos distincti ceu totidem Canaliculi, post varios ductus & flexus multiplices, conveniunt plurimi circa mediam Cerebri basin & Cerebelli fundum, coactique efficiunt rotundum Corpus, *Medullæ* servans nomen; sed addito epitheto *Oblongatæ*; producti, & per Occipitis ossis foramen in thecam illabentes Vertebralem, Corpus triangulare, quod *Spinalis* cognominatur *Medulla*. Uti ex Oblongata erumpunt intra Cranium decem, & plura forte, Nervorum paria, sensuum inservientia Organis, aliis Capitis partibus, admirabili etiam Varietate Medio infimoque Ventri: ita è spinali exeunt per internodia Vertebrarum paria triginta, quæ totidem etiam sunt fasces Tubulorum Medullarium Vestiti Meningibus, in ambitum Corporis distributi atque extrema, five Musculorum genus; ubi tandem in minutissimos & capillares ramusculos diffissi dispersique evanescent, aciem, qua cernimus, fugientes.

§. I X.

Nunc ad sanguinem redeo, quem *διαλυόμενον καὶ πνευματόμενον* impelli sursum dixi exeunte Thesi VII. Nutrit hic Cerebrum, continuo, ut reliquum Corpus, quid amittens; dum pori Arteriarum impetueruentis è Corde sanguinis dilatantur, dum ex iis profiliunt particulæ minus etiam solidæ & flexiles, quæ similem sibi superficiem nactæ, eique adhærentes, quod deerat, perieratve, instaurant. Si vero hisce exitus detur, equidem facilius dabitur multo magis vividis, subtilibus, solidis, quarum insignis adest copia, secretæque illæ in diversis Cerebri partibus, & Spirituum nomine, è Chemicis transcripto, dona-

tæ, varios in usus vel sponte sua abire poterunt,
 vel dimissæ directæque à Præside Animo; cujus di-
 rectionis modum quærenti ingenue respondeo, me
 non percipere. Inprimis tamen consideratu dignum
 est, innumeros Arteriarum Carotidum & Cervica-
 lium furculos & reticulares plexus, utriusque ἐγκε-
 φάλης, προοπίης καὶ ὀπισθίας, superficiem perreptantes,
 significare non privatum Nutritionis usum, sed pu-
 blicum & multo præstantiorem. id volo, Liquidissi-
 mum sanguinem in Corticalibus glandulis amittere
 florem suum, τὰ ἐνορμῶνται μόρια, impetum facientes
 particulas, mirum quantum puta motas, tenues, at
 pro ratione molis plurimum habentes virium, quales
 inesse sentimus salibus aliisque Volatilibus: secretum
 porro, dictumque Animalem Spiritum capeffere iter
 Thesi viii apertum, in tubulos nimirum Canaliculos-
 ve albicantem constituentes Medullam; quorum pluri-
 mi cum denique, ut notavi, in oblongatam compin-
 gantur Medullam, eo pergere, itaque recto ductu
 in Spinalem, inde per conjugationes nervosas cum
 alio, tum in conspicuos Artuum Musculos.

§. X.

Musculi, proxima voluntarii potissimum motus in-
 strumenta, ex collectione fiunt fibrarum motricium;
 in quibus carnem videre est, in medio fere, utro-
 que in extremo tendinem. hic ubi oritur, κεφαλὴ
 μυὸς vocatur; ubi inseritur, πλευτὴ sive κατάφυσις;
 κοιλίαν ἢ γαστήρα facit caro, adpersa tendineis fibrillis,
 quæ idcirco, uti in Tendinibus connexæ, ita in Ven-
 tre non possunt non laxius junctæ esse: quamobrem
 Fibrillas, musculosam perreptantes carnem, bene &
 vere appellavit *divulsum Tendinem Spigelius*. His-
 ce quo modo rectis ubi transversas addidero mem-
 bra,

branaceas, quæ inter se parallelæ fibras carneas obli-
quis angulis secant, propriæque Musculi membranæ
sunt continuæ, ea in Musculo indicasse videor, qui-
bus motus perfici potest, perficiturque, simul ac
Mens voluerit. In Naturali statu Nervorum canali-
culi æqualiter spiritibus replentur, tubuli etiam ac
pori, qui inter fibrillas, è quibus Organa constituun-
tur, non possunt non dari, illis pleni sunt, & aliis
quoque è sanguine suggestis. Cum Menti lubet mem-
brum aliquod movere, illico, æqua vi sublata, ma-
ior ad id per Nervos fit spirituum pulsio, expulsio-
que è propaginibus in Musculum, movendo illi mem-
bro dicatum, premuntur Tubulorum latera, recedunt
laxæ & molliores partes, tensilia filamenta ad lineam
magis circularem vergunt, itaque adducto tendine,
sequitur membri motus, cui inferitur. Non est è
numero eorum, fieri quæ posse neges, particulas
nitro-sulphureas, quas emittit sanguis, & spirituoso-
salinas, è nervis prodeuntes, ubi plures commiscen-
tur, statim magis effervesce, & promovere subi-
taneam musculorum inflationem. Volunt etiam Viri
Sapientes accèdere spirituum momentum ex Antago-
nista musculo extento, ubi alter contrahitur, per
Tubulos inter medios, in quibus Valvulas concipiunt,
refluxum spirituum Animalium ex altero in alterum
musculum impediētes; iisdemque Valvulis & Ner-
vorum & musculorum tubulos esse instructos. Cogi-
tata sunt ac Hypotheses, phænomenis hisce expli-
candis idoneæ, nec adversæ rationi. ego autem eas
in medio relinquo.

§. X I.

Ita, quæ Thesi iv. promiseram, peregrini dixi enim
de Musculis, Nervis, Medulla Spinali, Cerebro,

ostendi *Spirituum Animalium* γένεσιν, fluxum, & continuum æqualem, & certam in partem ab anima volente auctum, ortumque inde per sana Organa motum arbitrarium. Hic integer durabit, ubi, quæ recensui, manent integra; unius pluriumve Ἀλγείων vitiatam excipit, ut Corpus umbra, magis minusve læsus. Quorum in Paralyfi, & quam dispositionem præter Naturam? spinalis Medullæ, nervorum, musculorum *Obstructionem*, *Compressionem*ve, *Intemperiem*, *solutam Unitatem*. Vide materialem, qua usus sum, definitionem meam Thesi III. & ex ante dictis collige, modum pariendæ partæve Paralyfios, quem nunc quoque eo illustratum, illarum ὧσα φύσιν Ἀλγείων *Causas* explicando.

§. X I I.

Ingenue fateor scrupulum & dubitationem haud levem mihi. iniecisse nobiles arte Viros super statuenda in genere nervoso *Obstructione*. Hæsitat in cæteris *Cl. Sylvius*, acer & perspicax: nam, *Prax. Med. l. 2. c. 21. de Apoplexia agens*, deficere ait spiritus in sensuum motusque Organis posse, nervorum in spinali medulla conclusorum culpa, quando medulla angustatur; id autem fieri *Obstructione*, dummodo, subjungit, talis accidere queat, quod iis probandum relinquo, qui hoc adserunt. Nimirum Cavitas, inquiunt alii, nec stylo, nec folle, nec microscopio potest inveniri, ideoque non, nisi temere, statui ἐμφραξίς, *Obstructio*, morbus conformationis in meatu deficiente. Ubi autem inveniri non potuit Cavitas? in corpore post mortem aperto. At nihil stultius esse censent Ἐμπειροὶ apud *Celsum in Præfat. lib. 1.* quam, quale quid vivo homine est, tale existimare esse moriente, imo jam mortuo. posue-
rant-

rantque antea rationalem professi medicinam, longe optime fecisse Herophilum & Erasistratum, qui nocentes homines, à regibus ex carcere acceptos, vivos inciderint, considerarintque, etiamnum spiritu remanente, ea, quæ natura ante clausisset. Idcirco *Galenus* etiam voluit, ut Nervi optici, quos statuit manifeste cavi, diffecarentur magno in animali, statim post mortem. Non semper apparent tenues lactei lymphaticique ductus; adsunt tamen, & quidem cavi. Minutissima vascula, quorum congeriem Testes facere, non glandulosam, non pultaceam substantiam, non sui generis Parenchyma, *Regnerus Graevius* docuit, ni semine turgeant, æque advertunt oculum scrutantis, ac ductus illi non distenti; ad conficiendum tamen & transmittendum semen comparata sunt. Si fieri etiam posset, ut, vigente sanguinis & secretorum spirituum motu, Cerebrum & Nervi perspicerentur, clariorem eorum faciem futuram arbitror. Quid multis? Tubulos vocare cum Anatomicis Præstantibus Canaliculos & Tubulorum fascies, ex quibus Cerebrum Medullare ac Propagines constant, & contendere, quod *τυπόμενοι*, quasi pulsando aperti, *χανόντες*, hiscentes, non sint, adeo durum est, ut Doctoribus accedam, qui aliter opinantes admittunt Obstructionem.

§. XII I.

Obstructionem vero *continens* quærenda erat *Causa*. Crediderim non minus alienos ab ea fuisse quosdam propter Nerveorum Tubulorum conditionem, quam rei hosce obstructuræ. Dubii sunt & controversi Humores alii: frequentissima Causa statuitur tenuior Pituita. Vide *Fernelium*, *Riverium*, *alios*. Particulæ hujusmodi, copiosæ pulso sursum sanguini

ni commistæ, cum subtilissimis, licet per Venulas alio referri deberent, aliquando exeunt per poros Glandularum Corticalium laxiores in Tubulos medullares: illarum motui, dum queunt, obsequuntur: quiescentes mediis in viis cumulantur paulatim, & varios, pro varia locorum ratione, pariunt adfectus: ad medullam oblongatam, spinalis medullæ principium vel ulterius prolapsæ hærentesque multiplicem ponunt spiritibus defluxuris obicem, Obstructionem dico, & Paralyfin faciunt, post distinguendam. Multi pro certo habent, Intestinalis Pituitæ partem, si non semper, saltem aliquando in tenues lacteos influere meatus, & trajicientem mesenterii Glandulas pergere ad superiora. Nonne illius ingenii humor, magis etiam in sanguine attenuatus, facile vasa quæcunque capillaria possit ingredi, haud una de causa ibi hære, obstructions varias creare, atque his copulata symptomata, in Pulmonibus, exempli causa, in Utero, in partibus externis? nihil admodum obstare censeo, quo minus hæc etiam fiant in Cerebro ac Nervis. Cum igitur absurdum non videatur, admitti τὸ φλέγμα ad obstruendum, facilius equidem admittetur ὁ τῆς αἱματος ὁρρὸς, serum sanguinis, ad infringendum Canaliculorum πόνον; quamvis idem, quod Pituita, possit, ubi, discusso humido, fuerit compactum. Extra Corpus vix invenias spiritum ita rectificatum, (Chemice loquor) cui plusculum aquæ non sit adjunctum: in corpore etiam pars est spirituum animalium tenuissima aqua, quæ illorum habetur frænum. Copiosior admista & profluens non languidiores modo facit spiritus, sed fibrillas paulatim flaccidas, propter inductam in ipsas ἀκρασίαν sive Intemperiem. concidentres autem illæ aqueis quoque involutas, vividiores
ali-

aliter, spirituum particulas sistunt unde etiam ἐνέργεια,
animalis Motus, læditur.

§. XIV.

Compressionem, quæ pluribus acceptior est, faciunt Incumbentia. In hisce Familiam iterum ducit Pituita, vel propriè dicta, vel ex sero lymphaticove humore, in variis Cerebri partibus secreto, plerumque oriunda: hæc enim nisi per vias naturales defluens excernatur, vel si justum excedat modum, stagnare potest, sensim prorepere, incubando premendoque angustare spinalem Medullam, vel secundum eandem ulterius prolapsa circa peculiarem Nervi exortum hære non sine momento & noxa. Sic etiam Crasin vitari posse in Fibrillis Medullæ, Propaginum, Musculorum, maceratasque eas ad officium suum ineptiores fieri, & ratione cognoscere est & usu. Non autem poscitur, ut totus maceretur ductus: propter interpositam affecti atque emolliti nervi portionem ineptus fit reliquus, qui ad partes pergit, ductus, partiumque earum sequitur resolutio. vide *Platerum* de Paralyfi, & *Sylvium*. Hic de aquosiori sanguinis parte secreta in Cerebro verba faciens, *Disput. Med. iv. §. 33.* suspicatur, coagulari eam sub tenui Meninge in liquorem, qui sensim ad Ventriculos, hinc per Infundibulum ad Glandulam Pituitariam tendat *secundum Naturam*; dum pars ejus fluidior pedetentim destillat ad Uvulam, ut blande irriget Fauces, Laryngem atque Gulam, concrefcere partem ejus viscidiorcm in Mucum, per Nares, & quandoque per Os etiam excernendum. Quoties autem major aquæ copia producitur *præter Naturam*, uti non raro in multis ægris sub ipsa tenui Meninge adhuc hærens observatur, toties aut in Cerebro

rebro Stagnantem, aut in Nares, Fauces, Partesve inferiores secundum Medullæ spinalis ductum delabentem varios, graves, imo lethales excitare morbos. *In Comprimentibus* porro numeratur *Sanguis* effusus è Vasis, vel ruptis nimia rarefactione, aut copia, aut causis violentis, casu, ictu &c. vel erosio ab acribus (inde tamen alia incommoda videntur potius oritura.) Idem etiam Sanguis vasa sane quam distendens (hic quoque stuporem potius aut formationem, quam perfectam aut diuturnam Paralyfin efficiet) *Tumor durus* è callo vel cicatrice post vulnus, aut contusionem in nervo excrecente. *Tuberculum* è tenaci nutrimento Nervi natum. *Tumores* in partibus vicinis. *Vertebrarum luxatio.* cedentes Vertebrae dorsum incurvare possunt citra Medullæ compressionem, ut fit in Gibbosis. *Vinculum arctius.* Cætera omitto.

§. XV.

Nec immorabor πῶς τὸ συνέχειαν λύσει, *continuum seu Unitatem solventibus*, cum, quæ Nervos discindunt, vulnerant, contundunt, manifesta sint, unaque ratio motus hic pereuntis. Obstructo Compressiove meatu penetrare spiritus quid subinde posset. qui vero possit discisso eodem & retracto? Contusos nervos effusus etiam Sanguis premit; uti procul dubio in illo, qui *apud Dodon. in observat.* fabrili virga regulave pulsatus illico in Paralyfin incidit. Salubrior pulsatio erat, qua Andreas Meklenburgensis, multos deinceps annos luctatus cum cæcitate utriusque oculi, extrinsecus integri apparentis, petitem varia Medicina visum recepit. Vide *Jobi Mekera- ni observat.* xxvii.

§. XVI.

Causas in jam dictis haud obscure indicavi, quæ *Continentibus antecedunt* frequentioribus; *internas*, admixtæ sanguini copiam Pituitæ, ac Seri, laxiores etiam Corticalium Glandularum poros, vel diathesin Cerebri, Cerebelli, aliarumve partium deterio-rem. Hæc particulas emittit complures, spiritibus admixtas, vel collectas alibi, undi mali labes. Diathesis autem illa vel hæreditaria est, vel post nata. Comperias enim quosdam Parentibus infirmis, & è Cerebro laborantibus ortos, eodem fere modo à teneris vexari. Sed produci etiam deinde potest continuo appulsu sanguinis, uti dixi supra, vitiiati infectique. Inficiunt ita *Res* sanguinem *Remotiores*, quarum usus sequior destruit Naturam, dexter conservat, ideoque, ne careant nomine, Non-Naturales dictæ sunt Medicis; vel contractum paulatim vitium augent, movent, excitant. *Aër humidus, nebulosus, frigidus & asper* fovet pituitam & serum, atque omnes succos glandulares, qui multo phlegmate temperantur. Huc *aquam* refero *pluviam*, quæ una diutius aliquam in partem cadens emolliendo est fibras. Pallium ipsa madens, collo diu obvolutum, resolutam manum fecit, uti docet *Galenus. 4. de loc. aff. c. 4.* *Siccus calidusque aër* discutit tenues seri partes, viscidas etiam dissolvit; cogit iterum *asper* illi superveniens. *Cibus quantitate* nocet, quod cruditates generet; *qualitatibus*, quæ manifestæ in lacte, piscibus marinis, animalium extremis, leguminibus, ole-ribus, lactuca, cucumere, &c. *Pro Potu* Cerevisia haud bene cocta vel digesta. Vinum acidum, asperum, lenius quoque, sed plus paulo adbibitum; ita enim & alibi copiosius phlegma secernitur, & in Ca-

C 2

pite,

pite ; unde accenferi possit *ναρκωτικῆς* , quæ sale ab-
 undantia volatili incitant sanguinem , ex eo serum
 fundunt moderatius , spiritibus jungendum , ut faci-
 lius quieti se tradant. Si nimia Seri Pituitæve exeat
 copia , Gravedines oriri videas , affectus Soporosos ,
 Apoplexias , Paralyfes. Mirum est , quod de suis
 Agrestibus refert *Ælianus*. Ὅταν αὐτὰς λαθόντες
 ῥοσκυάμῃς φάγωσι , τὰ ὀξόπιον ἐφέλκῃσι , παρεμένως
 ἔχοντες ἑαυτῶν. Εἶτα Ἰπὶ τὰ ὕδατα ὠδωγενόμηναι
 τὴν καρκίνων ἀναλέγῃσι , καὶ ἐοδίσιν , ἐργάζονται ἣ ἔπει ὕγι-
 ας αὐτὰς αὐθις . Pleniora hæc vide *l. i. c. 7. Var.*
Histor. Pari admodum ratione lædunt *Vita deses*
ac sine curis ; Quies nimia ; Somnus multus ; Animus
pusillus atque ignavus ; Terror , mæror premens ac
 perdurans ; tarda plerorumque *Excrementorum deje-*
ctio : potissimum si repentinus *Motus* , urgens *Sol-*
licitudo , *Vigiliæ* protractæ , *Ira* vehemens illis in-
 tercefferit. Ita Res non-naturales. Verbum addo
 de præternaturalibus. Apoplexia Salutaris haud raro
 desinit in Paralyfin. Eandem Epilepsiæ succedere ,
 Peripneumonix , Colicæ , suppressis Hæmorrhoidi-
 bus , Scorbuto , Arthritidi , aliis , nōtant Autores.

§. XVII.

Distinguitur hoc respectu Paralysis 1. in *Prima-*
riam & Secundariam. Hanc translata alterius Mor-
 bi materia procreat , illam sua. Si 2. toti infideat Me-
 dullæ , atque omnes Capiti subjectæ partes resolvantur ,
Ἀπληγία dicitur. Medullæ inquam toti quia ,
 uti Cerebrum antè Falce , ita hæc tenuis Meningis
 interventu duas in partes dividitur. Si dextram ,
 sinistramve occupet partem , *Ἡμιπληγία* erit :
Paralysis Particularis , ubi una quæpiam laborat
 Pars , Lingua , Oculus , Maxilla , Labrum , Bra-
 chium ,

chium, Manus, Crus, Pes. interior etiam, Intestinum, Vesica, aliæque? sunt, qui velint, nullum viscus à Paralyfi liberum esse: 3. *παράλυσις ἐστὶ μάλισ-
τα λεγομένη*, vel *Perfecta* Riverio, cum motus, sensus-
que pereunt. quod fit, ubi cum obstructis compressive
Nervorum tubulis Intemperies insignis concurrit. Si
languet utraque *ἐνέργεια*, *Imperfecta* est. etiam, si
motus desit, remanente sensu; ubi tantum spirituum
non transmittitur, quantum motus postulat; licet
Fibrillæ quædam adhuc tensæ impressum ab Objectis
motum ad Cerebrum deferre possint. contra, si sen-
sus desit, motu superstite. cum satis defluit spirituum
ad partes, sed laxæ, flaccidæque sunt Fibrillæ.
Qui tamen crederet remanentem sensum motumve,
alterutro affecto, vigere posse, mea quidem senten-
tia erraret. Eadem ratione *Magna vel Gravis*, *Le-
vis* vel *Parva* nominatur. 4. Tempus, quo orta est,
quoque affligit, *Recentem* facit, & *Inveteratam*,
Continuam & *Periodicam*, cujus exemplum *Joubertus*
refert in Quæstion. de Paralyfi.

§. XVIII.

Utile Medico est atque amplum, non, quæ ante
pedes modo sunt, videre, sed etiam prospicere fu-
tura. poterit enim sibi famam quærere & rem; quod
in pretio habituri sint homines Virum, artis suæ scien-
tem, fisuri lubentes præfagienti animo, quibus præ-
cedentibus Morborum timor subsit, iisque ipso in
tempore succurrenti. *Σημειωτική* igitur non negligenda.
Instantem Paralyticam Valetudinem denuntiant
1. Pondus Capitis, nebulam quasi & caliginem fun-
cturæ suo officio Menti offundens. 2. Cephalalgia
frigida, & subsequens eam dentium stridor, antea
inauditus. 3. Tremor Partis resolvendæ, quæ cladis

incipientis nota. 4. Torpor, auctæ. 5. Stupor propinquæ. Hic proximus ad Paralyfin gradus, imo tantum non ipsa Paralyfis, inquit *Bellin. de Morbis Capitis p. 531.* Quibus licet addere 6. crudescentem Urinam, alii viridem dicunt. 7. Pulsum languidum. 8. Insomnia. nam in somno Phantasia debetur etiam vitio qua in parte nascenti. Putabat aliquis dormiens lapideum se crus habere, & post paulo resolutum habuit. Quamobrem haud temere *Hippocrates*, *ordiens πρὸς ἐνυπνίων*: qui de his, quæ per somnos contingunt, recte conjectaverit; is ea per omnia magnam vim habere comperiet. *Præsentem ἀγνώσκω* Medicus ex Symptomatis, quæ §. III. ostendere dixi, quod Morbus adsit, 1. sensu aliquando 2. motu imprimis animali deficiente, nec non 3. relaxatione partium, 4. frigore, & denique 5. ἀρεσφία. quibus differt à Convulsione, Catalepsi, similibusque affectibus; cum in hisce rigidæ sint partes & firmæ, καὶ ἡ γνώμη νοσῆσαι, quæ hic sua non dimota fede.

§. XIX.

Hæc *Morbi ἀγνώσις*; *Causæ*, exempli gratia, Pituitæ, quam dixi frequentissimam, petenda 1. ex Antecedentibus, quæ generandæ illi Cacochymia apta nata posui §. X V I. Hisce addo 2. Mutationes temporum, potissimum parientes morbos, & in ipsis temporibus magnas mutationes aut frigoris aut caloris. *Hippocrat. Sect. 3. Aph. 1.* 3. Regionem, solo frigidam, humidamque, & coelo. Per imbres longæ febres, alvi dejectiones, angina, cancri, morbi comitiales, resolutio Nervorum, quam ἀγρίλυσιν Græci nominant. *Cels. l. 2. c. 1. medio.* 4. Ejusmodi

di corporis constitutionem. 5. Ætatem primam & præcipientem. 6. Debiliorem fere sexum. 7. Morbos, qui præcesserunt, congeneres. 8. Excreta, prodentia causam. 9. Juvantia & Nocentia. Copiam sanguinis prementem declarabunt Plethoræ signa, inque iis Torpor & Lassitudo spontanea; Color verus, vividus, floridus; Vasa turgentia; Pulsus plenus, magnus; Diæta corpus solidum & succi plenum faciens. Dubias causas non explico. Externæ quæ fuerint & *περὶ αὐτὰς*, æger quique circa eum referent. *Ipsam Mali sedem, partemve primo affectam* eo certius quis *ἀγνώσκει*, quo rectius ex Anatome Origines Nervorum, distributiones insertionesque in Musculos, etiam perspicendos, didicerit. Confer XVII. & VIII. de Nervis, ex oblongata Medulla intra Cranium, & è Spinali exeuntibus.

§. XX.

Censebam §. XVIII. expedire Medico, ut certis è notis imminentem dignosceret Paralyfin. Haud minus ipsum decet. è conditione præsentis *περὶ γνώσκειν* eventum, ne vel temere despondeat curam, vel ægrum lætetur spe vana, atque optima medicamenta infamet, illis cum pollicitatione medicando, quibus nulla salutis spes superest. Videat ergo præcipua morbi hujus discrimina, quæ habet §. XVII. & facilis erit *περὶ γνώσις*. 1. Apoplexiam excipiens Paralysis difficillime sanatur, aut nunquam. Didici è Lugdunensi Cive, Viro honesto, matrem suam ex Apoplexia annos amplius triginta, usque ad obitum, Hemiplegia paralytica laborasse. Quid sperandum sit, ubi discissus Nervus, ex hujus natura liquet. Cui adde luxationem neglectam. 2. Si Hemiplegia adeo pertinax, Paraplegia licet primaria, cum pluribus, noceat
par-

partibus, neutiquam facilius erit. 3. Perfecta lædit
 gravius, ideoque dura ad Medicinam, uti & 4. In-
 veterata. 5. In Senibus. 6. Hyeme. 7. Macre-
 scentibus in Membris fere opera luditur. *Celsus* hæc
 eleganter ita exprimit: quacunque parte Corporis
 Membrum aliquod resolutum est, si neque movetur,
 & Emacrescit, in pristinum statum non revertitur,
 eoque minus, quo Vetustius id vitium est, & quo ma-
 gis in corpore Senili; omnique resolutioni Nervorum ad
 Medicinam non idonea Tempora sunt Hyems & Autu-
 mnus. Isque morbus Vehemens Sanari non potest.
l. 2. c. 8. ex. Contra, aliquid sperari potest. 1. Si
 Pars resoluta alatur. 2. Vere & Æstate. 3. In Junio-
 ribus. 4. Si Morbus recens. 5. Mediocris vel levis.
 6. Pedes & crura habeat. 7. Si pulso frigori succedere
 incipiat Calor. 8. Tremor. 9. Febris superveniat.
 10. Diarrhoea.

§. XXI.

Exposito Morbi ingenio, cognitisque Indiciis cum
 aliis, tum quæ Medentes & Ægros vel spe consolen-
 tur, vel metu terreant, auderem quoque ejus Cu-
 randi rationem ampliori Sermone tradere. Sed quia
 præter opinionem corpus fecit mea disputatio, hic
 rem conferens in pauca, & ad Pituitam modo respi-
 ciens, quæ Nervos angustat, spirituque intercepto
 Motum lædit animale, Vias illam tractandi, una-
 que opera Morbo & Symptomati acerbo Succurrendi
 breviter & generatim aperiam. Pituita *loco* peccans
 indicat sui *remotionem*. Sed difficilius removebitur,
 nisi, morando etiam, *qualitate* peccans præparetur.
 Quapropter & Morbum continens, & fovens aliun-
 de adfluendo, sui *adtuenuationem*. adtenuata *Expul-
 sionem*, præsertim cum & *Copia* gravis sit, indicat.

De-

Denique Pars affecta vel debilitata sui *integrationem* poscit.

§. XXII.

Præparant Pituitam, sive humoris viscosi particulas hamatas ramosasque, cum flexilibus quibusdam lubricis copulatas, discerpunt, incidunt, dividunt Aromatica dicta, Sale, Oleo, Spiritu acri turgentia: *Radices* Acori, Angelicæ, Aristolochiæ, Chinæ, Caryophyllatæ, Contrajervæ, Fœniculi, Fraxinellæ, Galangæ, Helenii, Imperatoriæ, Iridis Florentinæ, Pæoniæ, Petasitidis, Valerianæ, Scorzonæ, Sarsæparillæ, &c. *Cortices* Arantiorum, Cinnamonomum, Citriorum, Ligni Guajaci, Macis &c. *Ligna*, Guajacum, Sassafras, Juniperinum &c. *Folia* Betonicæ, Calaminthæ, Chamædryos, Chamæpytios s. Ivæ Artheticæ, Hyssopi, Majoranæ, Melissæ, Origanii Cretici, Paralysis Herbæ, vel Primulæ veris, Rorismarini, Rutæ, Salviæ, Thymi &c. *Flores* Calendulæ, Caryophyllei, Cheiri, Crocus, Hyperici, Lavendulæ, Liliorum Convallium, Pæoniæ, Rorismarini, Salviæ, Sambuci, Stæchados, Tiliæ &c. *Semina*, Cardamomum minus, Cardui Benedicti, Cubebæ, Fœniculi, Nigellæ, Ocymi, Rutæ, Sileris Montani &c. *Fructus*, Baccæ Juniperi, Lauri, Sambuci, Caryophylli, Grana Kermes, Nux Moschata, Piper. &c. Plura è Vegetabilibus possem promere, si ea percurrerem, quæ monstrante *Petro Hottono, Botanices & Medicinæ Hac in Academia Celeberrimo Professore* didicisse me grata habeo in memoria. *Partes Animalium*, Cancrorum Oculi, Castoreum, Cornu Cervi, Cranium Humanum, &c. *Mineralia*. &c. Antimonium, Sal Ammoniacus, &c. Ex hisce paratæ Aquæ Simples, Compositæ, Spiritus, Olea,

Sales Volatiles, Fixi, Pulveres, Syrupi, &c. *Misceri* possunt, uti ex variis simplicibus in aqua vinoque decoctis *Apozemata* confici, in vinum infusis *Medicata Vina*, quæ commodo præstantique usui sunt & alibi, & Chronicis potissimum in Morbis. Mulsam quoque aquam sive ῥόμελι pulcerrimæ collectioni addit in sua Paralytici medicatione *Freder. Dekkers, Medicinæ Practicæ Lugdunensi in Academia Professor Meritissimus, dum vivam, mihi Honorandus Præceptor meus.*

§. XXIII.

Expellunt Pituitam præparatam & πέποιτα, ut jubet *Hippocrates sect. 1. Aphorism. 22*, (quamvis olim Asclepiades, & deinde alii non dubitarint, absque præparatione vel πεπασµῶ statim etiam καθαρτικὸν φάρμακον exhibere) Phlegmagoga, non mitia hoc in loco, sed validiora & pleniori dosi, ne facile ac brevi à Pituita infringantur, sed per totum circumacta corpus particulis suis rigidioribus in omnia latibula penetrent, & fermentando noxium educant humorem. Quanti sint μυροβάλλαντοι Emblicæ, Belliricæ, Chebulæ, non obscure sentias, quod in ordinarium Amstelodamensis Pharmacopœæ medicamentum non sint admixtæ. unæ Citrinæ in Pilulas sine quibus. Notius est Cnici sive Carthami Semen, unde Syrupus Ἀλ' κνίκε, Electuarium dia Carthamum. Euphorbium vehemens est. Valent Jalappa, Mechoacanna. Egregii censentur usus Agaricus sive Fungus Laricis, Hermodactylorum Radix, Turbith gummosum, atque amara Colocynthis, quæ arte tractata nobis dat Trochiscos Alhandal. Mercurius dulcis digerit egeritque humorem pituitosum, moram

ram trahit in Sanguine , & facit, ut post peractam purgationem alvus non sit ita dura. Hisce vel acui potest Medicina attenuans , ut sordes expellantur per *ἐπιχειρῶν*, vel ei, aliquot deinceps dies haustæ, possunt opportunè subjungi diversa forma.

X X I V.

Removent Peccantem loco Pituitam , Debilitatas etiam partes restituunt, itaque solvunt morbum & triste symptoma eadem illa , quæ præparare dixi, (ciendis etiam sudoribus sunt compluria) & per alvum expellere ; siquidem prudenter præscripta commendare medicus, præscriptis uti lubens volensque Æger, suggerere Præsentes, quæ prosint, arce-re, quæ noceant, perseverent: *δὲ ἃ ἔμεινον τ' ἰητρὸν περὶ χεῖν ἐωυτὸν τὰ δέοντα ποιεῖν, ἀλλὰ καὶ τὸν νοσέοντα, καὶ τὰς παρεόντας, καὶ τὰ ἐξωθεν*, uti recte *Hippocr. Sect. 1. Aphorism. 1.* Egregius autem positis accedet stimulus, magisque impelletur mali causa, si post remedia laudata advocetur efficax sudoriferum, quod mineralia habeat, sales alcalicos volatiles, præsertim fixos, quippe qui dividant constanter, feliciter penetrent & emoveant: quamobrem in iis sæpius repetitis magnam desideratæ Curationis partem consistere Viri sapientes & rerum periti existimant. Formulæ ab-
stineo, quarum copiam reperias certis in Auctoribus, Paralytici quoque quadragenarii exemplum, qui à *Cl. Dekkero* sanatus est , in notis ejusdem ad cap. 3. Prax. Barbettianæ.

§. X X V.

Internis, dictos comparatis in usus, subveniunt *Externa*. Multa sunt in recensitorum indice, alia etiam idonea , quæ *περὶ ἐξωθεν* feligere potest Medicus coquenda in aqua , cerevisia, additis vino & vini spiritu, iisque affectas partes fovendas cura-

re. Ex iisdem *Balnea* fient, non omisso Sulphure, Nitro, Sale lixivioso, communi, proderuntque, ubi antea corpus bene præparatum aut purgatum fuerit. Quid autem profutura adfirmo? posse rem infelicitè cadere, licet optime curata sint omnia, docet *Hildanus Centuriæ 5. observatione 6.* Illis neutiquam inferiores sunt Thermæ naturales sulphuræ. Oleis stillatitiis, expressis quoque, is infusorum & decoctorum addetur modus, qui nimiam illorum acrimoniam & exsiccandi vim mitiget. Commista hæc *Unguentis Linimenta* dabunt utilia. In *Emplastris* laudat *Cl. Præceptor meus Dekkers* Emplastr. de Ranis cum quadruplicato mercurio, tantillo Capthuræ & olei Succini, ut lenius fiat, imponendum Dorsi Spinæ; cui ante perfrixtæ, illini etiam potest conducens Paralyticis *Spiritus*. Sic promovetur adjuta Internorum vis: non equidem minus *Cauterio* actuali *Setaceove*, loco Cervicis posteriori, quam vocant Nucham, impositis: ita enim vitians spinalem Medullam pituita cito ac tuto removeri potest. Aliquanto molestius est Fonticulo Setaceum, sed multo utilius. ubi duo Fonticuli nihil admodum profuerant, evenit, ut unico setaceo morbus sit occisus, inquit *P. Barbette. L. 1. Chirurgiæ, c. 21.* Novi ego Setaceum cuiuspiam è consanguineis meis ademisse imminentis è pertinaci Ophthalmia cæcitatis periculum. Sed abhorrent ab optimis persæpe Ægri, καὶ παρόντες ἄλογοι offerantur iis *Vesicatoria, Cucurbitulae*, simplices & scarificatæ. Ἐρρίνα, πάρμικα φάρμακα, ἀποφλεγματίζοντα per Palatum & Nares è Cerebro Pituitam eliciunt. ergo & hæc, sed in tempore, erunt usui. Ex quibus optima parentur, & qua specie, docet in cæteris *Sylvius l. 2. Prax. c. 21. §. 76. & seqq. Vena incidi debet, si dentur Plethoræ signa, vel minus*
com-

commode circumagi sanguinem è Pulsu parvo & difficili respiratione pateat.

§. XXVI.

De *Dieta*, sive convenienti Paralytico rerum non naturalium usu, tacere propemodum decreveram; quod ex adversis, quæ §. xvi. posui, quivis haud ineptus facile secunda colligat. Malui tamen hæc breviter. Si *Aër* non sit *calidus & siccus*, arte fiat. Soli segniori succedit Luculentior Focus; cui adde fragrantia, Lavendulam, Majoranam, Rorem marinum &c. Tales etiam *Cibi* sint, *εὐχυμοί* semper καὶ εὐπεπτοί. Panis, Vinum, Carnes condiri possunt seminibus gratis Anisi, Carui, Fœniculi; Zinzibere, Cinnamomo, Garyophyllis, Nuce Moschata, Roremarino, Salvia &c. Continens *Æger*, cibi & vini parvus, seque & Medicum adjuvat. Meii, *μείς*, quod cognominant Athamanticum, Radices Cerevisiæ bene coctæ puræque vim & suavitatem conciliant. Expediit autem mutare aliquando Remedia, nec non Cibos. prudenter obsequi etiam desideranti quidpiam, potissimum si haud nimis à morbo alienum sit. Vide *Ampliss. Tulpium c. 8. l. 2. Observ.* de Marcore ostreis crudis sanato. *Somnus* prodest contractior. *Motus*, Exercitationes frequentes. Ingrediatur ipse, (*Celsi verba sunt l. 3. c. 27.*) si potest. Si id Crurum imbecillitas prohibet, vel gestetur, vel motu lecti concutiatur. tum id membrum, quod deficit, si potest, per se; sin minus, per alium moveatur, & vi quadam ad consuetudinem suam redeat. *Animi tranquillitas*, quæ placida est in adversis etiam minusque gratis & quieta constantia, præcipuè poscitur, uti & *Venter*, sui officii quotidie memor; alioquin admonendus.

UNI DEO SIT GLORIA.

Prudenti Sagacique

J U V E N I
NICOLAO VAN RY P

In Medicorum ordinem, post ha-
bitam publicè

D E

P A R A L Y S I

Disputationem, transcribendo

E T P R A T T E I N.

Quis me jacentem non humili Deus
Percussit æstro? quis tenuem lyram
Intendit, inspiratque lentos
Non solito furor igne nervos?

Duxitne, alumno præmia largiens,
Phœbus Camænas, perfaciles sua
In vota, secum, quæ choreas
Instituant, celebrentque R I P I

Insigne festum? dant placidæ vices,
Frontemque lauri frondibus inferunt,
Deprædicantes his labores
Muneribus, vigilesque curas.

Ille Ille, sensi, me raperet, nisi
Secura laudis carmina sperneret,
Plaususque virtus; namque votis
Sufficit ipsa suis abunde.

Nec

Nec raro amicus, flectere quas nequit,
Torquet Camænas; sæpius immemor
Attrectat invitas supremis
Plausibus excipiens sodalem;

Ab his remotum, & viribus imparem
Tacere præstat, ne male sedulus
In laude dentes invidorum
Exacuens reprobetur ardor;

Quem jure virtus despicit: invidos
Laus omnis armat, quæ numerosior
Exultat, imbellisque semper
Dedecorat populare serpens.

Laudes adornans alter ab artibus
Quærat decorem carminibus suis:
Est nostra in argumento amoris
Gratia sola, colende R Y P I:

Devota vobis omnia debeo:
Musæque surgunt, ac adolent Patri
Suos honores me probantes
Discipulum sociumque gratum.

Moresque iidem, qui tibi junxerant
Primis ab annis me stimulis agunt,
Faustosque progressus amicis
Plausibus his tibi gratulantur.

Qui scire gestit, quas meruit R Y P I
Doctrina laudes, publicus, audiat,
Patente quæ promat theatro, &
De reliquis bene judicabit.

HENR. SNAAKENBURG.

Ad Eundem.

*Exsultans Hygiæa manum Tibi porrigit, alta
Vota fovens de Te studiisque, Aptissime RYPI.
Circumstant en grata domus Tibi pignora: leta
Fronte Tuum cerno Doctum celebrare Parentem
Hos actus. oculos in Quem, dum ritè triumphum
Ferre paras, gerit intentos festiva Corona.
Hunc beat, & sobolem gnavo Genitore salutat
Te dignam. Surgit plausus Gnatumque Patremque
Felices Divis commendant publica Vota.
Et mea Musa choros agitans, gratantia verba
Accinit, officium ac socialia fœdera servans.
Ergo age, Docte, dies tam festos insere fastis,
Lætitiæ quos sancta dicat Concordia nostræ.
Erige spem captam, qua se Tuus extulit ardor,
Grandia laturus meritorum præmia, Phæbo
Auspice; conspicuum cujus suffragia Mystam
Te dicunt, laurusque probat Tua tempora cingens.
Palladis i tutus clypeo: nam Te Dea mitis
Suscipit, & teneris gavisa amplexibus ardet.
Macte novis Doctor titulis, artemque tropæis,
Reddita post ægris solatia, sæpius orna.
Conspiciare diu felix, sua stamina Parcis.
Tarda futura Tua medica clamantibus arte.
Fausta favor vitæ cultu quæsitus amico,
Fausta Boni spondent, venerantes candida mentis
Dona, Tuam jubèant quæ latè extendere famam.
Id Tua vel sollers poterit doctrina; sagaci
Ingenio quando sævis medicamina morbis,
Si qui forte ruant, meditaris. Tu modo perge
Judicium virtute, decus stabilire merendo.
Iprudens. honor ipse ferat Tibi semina laudis.*

JOH. à CAPELL.